

schogk grossen mit den versessen ezinsen gutlichen an allen intrack, hynderniß vnde widerrede awßrichten wollen, das ön gnugen sal, so doch das solche messen obin berurt bey der kirchen sant Niclas ewiglichen bleibe alß obin berurt ist, vnde geloben alle obin geschriben stucken vnde artickel stete vnde gantz gutlichen zw halten an alles geferde. Wereß auch das die gnante bruderschafft vnde gesellschaft der schützen die punckte stücken vnd artickel in form vnde weise wie obin gesait ist in zwkunfft durch erkennenunge beßer weise, wie sich das begeben mochte, zw verwandeln alle sampt oder etzliche stucken insunderheit, so sal ön das gantz macht sein an allen widerspruch vnde arges intragk, nictes hir an gehindert. Zw bekentniße orkunde vnde meher sicherheit willen haben wir Burekardus probest vnsere probestie, dar noch wir obin gnanten prior vnde das gantze capitel vnsers capitellß insigel an dissen briff lassen hengen, der do gegeben ist nach Cristus gebort tausent virhundert vnde darnoch in dem söben vnde dreiszigisten iare an dem nesten montag noch vnsere liben frawen tage, den man nennet conceptionis.

Nach einer Abschrift in Barthel's Diplomatarium Lipsiense IV fol. 207 im Rathsarchiv zu Leipzig.

### No. 211. 1438. 13. Dec.

*Probst Livinus und das Capitel verpflichten sich zur Absingung eines von den Gebrüdern Pudernass gestifteten Lobgesanges auf die Jungfrau Maria und nehmen die Stifter in die Gemeinschaft ihrer guten Werke auf.*

Wir Liuinus Stregis probst, Johannes Pistor prior, Jacobus Storekewitz custos, Johannes vnnnd das gantz capitel des closters sant Thomas zeu Leipezk sant Augustinus orden bekennen —, das wir durch fleissiger bethe willen der vorsichtigen Lorentz, Donatus, Benedictus vnnnd Ciliax Pudernaß gebruder, vnnnd auch durch sunderliche frewntschafft, die sie vnß vnnnd vnßern closter bewißet vnnnd erzeget haben, alßo nemelich ezehen neue schock groschen, ezwey messegereth, eynen kelch, eyn pacem, eyn reuchkappe vnnnd andir ezirung der kirchen, die sie vnß vnnnd vnßern gotzhauß geeigent haben, sollen vnnnd wollen alletage teglichen nach der hohemesße vnsere lieben frawen lobgesangk ‚Haec est dies‘ singen, das man in yrem tage in der fasten gemeniglich pflegt zeu singen, vnnnd globen das vor vnß, vnsere nachkomlinge nw vnnnd zeu ewigen geezeiten stetiglichen zeu halten an alles geferde. Auch haben wir die obgenanten Lorentz, Donat, Benedictus vnnnd Ciliax Pudernaß gebruder durch yre sunderliche ynnekeit willen, die sie zeu vnß vnnnd vnßern closter haben, in vnßere bruderschafft genommen vnnnd nehmen in craft dißes brieffes vnnnd on alle vnßere werck, sie sindt an messen, vasten, wachen, predigen adir in welcherley maß die syn also verne, also got mit seyner barmhertzikeit on vnsere werck wil mittheylen. Vnnnd also gereden vnnnd geloben wir in dißem brieffe, wen got vbir die egenanten Lorentz, Donat, Benedictus vnnnd Ciliax gebuthit von der werlt zeu nemen, sie zeu begehn, gleich als eyn andirn; der do bruderschafft mit vnßer hoth. Des zeu ewigem gedechtniß haben wir Liuinus probst vnßere probstey sigil mit wol-